

Pader Daniel Szpila no lo sigui mas na parokia di Dakota

ORANJESTAD – Despues di 15 aña como pastoor di parokia Misa di Fatima na Dakota, pader Daniel Szpila a anuncia un cambio di parokia como sacerdote na Aruba. Te dia 9 di december pastoor Szpila lo ta na Dakota y despues e lo bay pa misa Santa Ana como ayudante di pastoor di Noord.

E anuncio aki a cay manera un hemchi di awa friu cerca e parokianonan di Dakota y tur otro creyentenan cu ta frecuente e misa aki pa atende e predicashi reflexivo, y te hasta tin biahha controversial di pastoor Szpila. Pero manera e mesun pastoor Daniel a declara na Bon Dia Aruba, 'cada sacerdote tambe tin cu reconece su tempo.' Den su caso e ta reconece cu su tempo ta concluyendo pa motibo entre otro cu su salud a deteriora un poco.

Despues cu pastoor Daniel a confronta un reto y prueba duro di cancer di cuero; y cu e malesa aki no a sigui desaroya mas, pero e ta haya cu su forza a mengua hopi. P'esey e ta kere cu un cambio ta necesario no solamente pa su mes, pero principalmente pa e mesun parokia di Dakota. E pastoor cu lo sigui cu e trabou cu pader Daniel a laga atras na parokia di Dakota ta pastoor Joseph kende ultimo tempo ta na misa Pro Cathedral San Francisco di Asis na Playa. Pastoor Daniel ta haya cu su sucesor ta un pastoor mas jong cu ne y yen di energia pa atende un parokia asina dinamico manera esun di Dakota.

Decision voluntario

Logicamente cada sacerdote tin diferente personalidad. Nan forma di traha y nan talentonan ta diferente, pero no mester lubida cu cada un di nan, ta un herment cu Dios ta uza pa cada temporada diferente, el a laga sa. E ta sali for di punto di bista cu esaki ta un decision completamente voluntario; ya cu otro aña e lo cumpli 60 aña, y e ta sinti cu e no tin tanto energia pa ta na cabes di e parokia aki cu un comunidad activo cu ta creciendo. "Si mi no ta hacie henter comunidad hunto cu pastoor ta cuminsa baha speed.... Mi no kier causa esaki tampoco," el a bisa.

Apesar cu e decision aki ta envolve tanto diocesis como su ordo of congregacion religioso di San Miguel Arcan-



gel, principalmente e decision aki ta uno boluntario di su mes. E mes a pidi esaki. E no por a revela esaki te cu diasabra ultimo, despues di un reunion intensivo entre Monseñor Secco di nos diocesis hunto cu superior general di e ordo di San Miguel cu a bini for di Polonia, unda nan a trata entre otro e cambio aki cu a wordo confirma diasabra atardi. Pader Daniel

mes no tabata sigur si e decision aki ta wordo aproba of desaproba, pero unbes cu el a haya sa, diasabra anochi el a informa esaki den santo sacrificio di misa.

"Ami pa mi paden ta sinti hopi paz. Mi no tin niun ansha. Mi a entrega esaki na Mama Maria," el a bisa. Cambionan

El a splica cu na su pais su congregacion tin e customber di bin cu e cambio aki maximo 9 aña cu un pastoor ta keda den e mesun parokia, y despues di e tempo ey, e pastoor tin cu cambia. Sinembargo ora cu nan ta den exterior den mision di nan congregacion e cambio aki no ta sosode cada 9 aña pa motibo cu tin otro realidad debi na scarsedad di sacerdote.

Pader Szpila a bisa cu e no ta nada facil ya cu ta wordo crea un laso familiar cu nan parokianonan; pero si e ta un cambio cu e mes ta considera necesario. E mes ta haya cu e cambio aki a tarda hopi pa diferente factor, pero e dia a yega. E cambionan aki tabata uno cu regularmente tabata tuma luga cada cierto periodo di 6 aña den e diocesis di Willemstand. Tin biahha e tabata tarda mas, tempo di e padernan Dominico. Pero ora nan a bay e cambionan aki a tarda pa falta di sacerdote den nos clero. E tipo di cambio aki por sosode normalmente ya cu ley di iglesia ta prescribi esaki.

Pader Daniel a bisa cu e ta spera cu e cambio aki no lo afecta e asistencia di parokianonan na misa di Dakota, ya cu si esaki ta sosode basicamente e trabou duro cu el a bin haciendo pa tres lustro ta perdi, y e lo ta un gran decepcion pe. E lo ta algo manera cu e mes a pone Señor Hesus na banda pa profila su propio personalidad den parokia. "Si esey lo a sosode, esey tabata un señal cu mi trabou tabata envano y cu ma fracas completamente," el a bisa.

E religioso ta sinti tambe cu e ta bandonando un famia; pero mescos cu bo tin famia afo y bo tin contacto cu nan, e ta keda na Aruba mes. Pader Daniel a expresa cu e ta sinti cu su tempo a conclui, 'e tempo cu Señor a yamami pa cultiva su cunucu aki na Dakota."

